



Program KUKUM Bersama Sekolah Berasrama Penuh 2006

Program KUKUM Bersama Sekolah Berasrama Penuh 2006 ini merupakan program tahunan KUKUM yang dijalankan secara berterusan pada setiap tahun. Program yang pertama telah dijalankan dengan jayanya pada tahun 2005 melibatkan 5 buah sekolah berasrama penuh di sekitar negeri Kedah dan Perlis. Program yang dipertanggungjawabkan kepada Pusat Kemahiran Komunikasi dan Keusahawanan (PKKK) pada kali ini merupakan siri yang kedua yang dilaksanakan oleh PKKK dengan mengorak langkah, membuka lebih banyak peluang kepada sekolah-sekolah berasrama penuh di sekitar negeri Perak dan Pulau Pinang. Namun begitu program ini tidak hanya tertumpu kepada negeri-negeri di utara sahaja. Sebolehnya program ini diharap dapat dikembangkan kepada semua sekolah berasrama penuh yang ada pada masa akan datang.

Objektif program ini adalah untuk mempromosikan dan memberi pendedahan awal kepada para pelajar Sekolah Berasrama Penuh bagi mengenali dan mengetahui Kolej Universiti Kejuruteraan Utara Malaysia (KUKUM) dengan lebih dekat lagi. Melalui interaksi yang positif ini diharap dapat mewujudkan hubungan yang baik di antara KUKUM dengan pihak Sekolah Berasrama Penuh bagi mendedahkan kepada para pelajar tentang program-program kejuruteraan yang ditawarkan oleh KUKUM. Di samping itu program ini juga dijalankan dengan tujuan untuk memberi bimbingan dan motivasi kepada para pelajar untuk mencapai kejayaan yang cemerlang dalam proses pengajaran dan pembelajaran.

Seramai lebih 260 pelajar dari lima buah sekolah menengah berasrama penuh dan sebuah sekolah Teknik di sekitar negeri Kedah, Pulau Pinang dan Perak telah dipilih bagi menyertai program Sekolah Berasrama Penuh kali kedua ini yang dijalankan pada 19 hingga 21 Jun 2006 yang lalu.

Antara sekolah-sekolah yang terlibat dalam program kali kedua ini ialah Sek. Men. Sains Tun Syeikh Shahabuddin, Sekolah Men. Berasrama Penuh Integrasi Gopeng, Sek. Men. Sains Raja Tun Azlan Shah, Sek. Men. Integrasi Kubang Pasu, Sek. Men. Sains Pokok Sena dan Sek. Men. Teknik 2 Sungai Petani. Program selama tiga hari dua malam ini telah dirasmikan oleh Rektor KUKUM, Lt. Kol. Prof. Dato' Dr. Kamarudin Hussin dengan tujuan mendedahkan para pelajar kepada konsep pembelajaran dan pengajaran di KUKUM serta program-program kejuruteraan yang ditawarkan di KUKUM.

Bagi memastikan objektif program ini dapat disalurkan kepada para peserta program, pihak penganjur mengambil inisiatif dengan menjemput wakil dari setiap pusat pengajian kejuruteraan di KUKUM bagi menjelaskan dengan lebih terperinci tentang program-program kejuruteraan yang ditawarkan di pusat pengajian mereka. Ini secara tidak langsung dapat membuka minda dan memupuk minat para pelajar bagi mendalami bidang kejuruteraan yang mempunyai prospek kerjaya yang luas. Melalui program ini juga diharap pelajar-pelajar yang hadir dapat melihat, mendengar dan merasai sendiri senario pembelajaran di KUKUM. Dengan itu mereka dapat mengetahui dengan lebih mendalam setiap program kejuruteraan yang ditawarkan di KUKUM dan melihat sendiri makmal-makmal yang dilengkapi dengan segala peralatan yang canggih dan terkini dan memenuhi kehendak pasaran industri, dewan kuliah serta segala infrastruktur yang disediakan kepada para pelajar di KUKUM.

Apa yang diharapkan ialah program ini dapat menarik minat para pelajar sekolah agar memilih KUKUM sebagai pilihan pertama mereka melanjutkan pengajian ke menara gading di samping menjadi wadah mempromosikan KUKUM sebagai salah sebuah pusat pengajian tinggi awam yang setaraf dengan IPTA yang sedia ada.

